

## Mustafa Mehmedagić, dipl. inž. geod.



Mustafa Mehmedagić je rođen u Sarajevu 14. 9. 1939. godine, gdje je završio osmogodišnju školu i dva razreda gimnazije. Godine 1957. kao stipendista Geodetske uprave BiH upisuje Geodetsku tehničku školu u Sarajevu. Odmah po maturiranju, 1960. godine započinje studij na Geodetskom fakultetu Sveučilišta u Zagrebu. Zbog slabih materijalnih uslova tokom studiranja se sam izdržavao. Stoga je morao raditi, pa je iz tih razloga, kao i zbog odsluženja vojnog roka, njegov studij potrajao nešto duže. Diplomirao je 1968. godine s vrlo dobrim uspjehom. Nakon diplomiranja se zapošljava u Republičku geodetsku upravu BiH, gdje ostaje dvije godine i radi na svim poslovima topografsko-katastarskog premjera Bosne i Hercegovine. Godine 1970. prelazi u Geodetsku tehničku školu u Sarajevu na radno mjesto profesora stručno-teorijske nastave. Državni stručni ispit položio je 1974. godine, pred komisijom za stručne ispite Republičke geodetske uprave Hrvatske. Kao honorarni asistent je od 1976. godine angažovan na Geodetskom smjeru Građevinskog fakulteta Univerziteta u Sarajevu, gdje je vodio vježbe iz predmeta Katastar nekretnina, Katastar zemljišta, Rudarska mjerenja i Geodezija. Upisao je postdiplomski studij iz oblasti Polivalentni katastar na Geodetskom fakultetu Sveučilišta u Zagrebu na kojem je položio sve ispite, ali nije odbranio magistarski rad. Radio je na mnogim geodetskim stručnim projektima, kao što su premjer gradova Sarajevo, Banja Luka, Modriča, Kladanj, Ilijaš i Laktaši, iskolčavanje trase puta Gospić – Karlobag, ispitivanje slijeganja terena u Tuzli geodetskim metodama, ispitivanje kranskih staza preduzeća FAMOS Sarajevo, rekonstrukcija žičare tvornice SODA SO u Lukavcu itd. Bio je aktivan u društvenom radu. Obavljao je dužnost predsjednika Zbora radnih ljudi Građevinsko-geodetskog školskog centra u Sarajevu, bio aktivan član Saveza geodetskih inženjera i geometara BiH, a od 1983. do 2005. godine član Redakcijskog odbora časopisa Geodetski glasnik. U penziju je otišao 2004. godine kao profesor JU Mješovita srednja građevinsko – geodetska škola Sarajevo.

Bio je veoma cijenjen kao stručnjak, a sigurno je da će najviše ostati upamćen i priznat po svom tri i po decenije dugom pedagoško-nastavnom radu u sarajevskoj građevinsko-geodetskoj školi, gdje se razvio u izuzetnog nastavnika. Već od prvih dana rada u toj školi pokazao se kao veoma savjestan, marljiv i istrajan u svojim nastavnim aktivnostima. Blage i besprijekorne naravi, uvijek pristupačan, jednostavan i optimističan, s beskrajnom energijom nesebično je prenosio svoje bogato teoretsko znanje i praktično iskustvo mnogobrojnim generacijama učenika. Među đacima je uvijek bio izuzetno omiljen. Vedrina i vjera u bolju budućnost nisu ga napuštali čak ni tokom ratnih zbivanja u Sarajevu od 1992. do 1995. godine. S neviđenim entuzijazmom i ogromnom hrabrošću mnogo je učinio na organizaciji nastave u nemogućim ratnim uslovima te mu pripadaju velike zasluge što škola nije prekidala svoj odgojno – obrazovni rad ni u tom najtežem periodu njene duge historije.

Preminuo je u Sarajevu, 24. 4. 2007. godine, a vječni smiraj pronašao na gradskom groblju Bare. U ime svih učenika kojima je predavao, beskrajno hvala izvanrednom profesoru i velikom čovjeku za sve što je u svojoj plemenitoj misiji učinio u procesu našeg stručnog i pozitivnog moralnog oblikovanja.

*Nedim Tuno*